

肇慶府志卷七

建置

四

壇廟

肇慶府

社稷壇在城西郊雍正十年建

吳志

乾隆五年奉准部咨動項

修葺

司冊

風雲雷雨山川城隍壇在社稷壇西雍正十年建祭日同社

稷乾隆九年奉行孟夏就壇行常雩禮於祭社稷山川兩項

原派定銀一十八兩五錢八分三釐二毫內通融撥銀三兩

七錢一分六釐致祭

吳志

先農壇雍正五年建先在西郊七年遷東郊壇高三尺四周

各三丈磚砌祠三間左右配房各一間周以繚垣藉田四畝

九分神倉一間祭器耕具俱全每年仲春亥日致祭其辦祭

銀兩在藉田穀價支銷各州縣同

厲壇舊在府城北一里後遷西門外社稷壇前春以清明日

秋以七月望日冬以十月朔日致祭俱同上高要縣附郭首

邑俱從府祭阮通志

關帝廟在北門大街南向開正門雍正三年奉

旨追封三代公爵遵

欽定封號置主供奉後殿乾隆二十一年知府吳繩年捐買

大正街民居改啓橫門西向吳志嘉慶十二年肇羅道竇國華

復改門南向高要志達東門大街採訪冊

文昌廟在東門外大街總督舊署西道光八年肇羅道許乃

濟捐倡僚屬暨闔郡紳士創建七營公送地基同上

國朝許乃濟文昌宮碑記嘉慶六年五月京師地安門外奉勅重修文昌帝君廟訖事

上虔伸展謁九叩禮成詔曰文昌主持文運福國佑民靈
跡最著允宜列入祀典用光文治於是禮部太常議攸關帝
廟儀制各直省春秋致祭著為令端城舊無專廟於城東崧
臺書院權奉祀事湫隘弗稱濟初蒞任集同僚議得隙地於
制府舊廨西昔為武員衙參之所武營出其地為廟基僉曰
善濟旋以調署糧儲道去廣州代濟者為邢江洪公率太守
長白珠公暨同郡有司卜吉於丁亥仲冬月各捐俸興事工
役則高要縣丞陳君銓董之越明年戊子孟夏濟自廣州還
任而廟適成是秋大比郡諸生捷者二十有二人元魁咸與
斯土創見也說者以為文運之昌廟有功焉然文昌所司非
徒曰科名已也孝經援神契云文者精所聚昌者揚天紀自
周禮大宗伯以禋燎祭司中司命天府祀天之司祿歷代尊
奉垂數千百年矣願端人士潔齊其志澡雪其身返而求諸
實行士風既立耕氓販豎罔不薰德而善良庶幾仰副
列聖文思光被化民成俗之中饗殿後為樓立三代主樓之上
事歟廟四楹前為門者二中饗殿後為樓立三代主樓之上
祀魁宿東西均翼以廊殿前東廊有門門內有室前後各數
楹為承祭官將事更衣之所其東猶有餘壤增修式廊俾不
至久而頽廢是有望於後
來者謹記其緣起於右

城隍廟在府治西一里元至正間總管潘文郁建明洪武間

知縣劉宗貴修宣德六年知府王瑩天順八年縣丞李均宏

治六年知府黃琥相繼修治 國朝康熙十二年知縣譚桓

重修高要志五十五年知府宋志益重修阮通志嘉慶二十一年

知縣陳聞炳修高要志

明陳獻章城隍廟記端陽城隍廟在刺史堂之西歲久就敝
宏治癸丑冬郡守黃侯撤而新之命生員陳冕來徵記侯豐
城人名琥予曩從吳聘君游往來劍水宿其家自侯來守端
陽七年于茲愈相傾慕安能已於言耶今天下府州縣有城
郭溝池有山川社稷百神主之而統其祭者謂之城隍神明
制也不俟言矣然神之在天下其間以致顯稱者非以其權
歟夫聰明正直之謂神威福予奪之謂權人亦神也權之在
人猶其在神也是二者相消長盛衰之理焉人能致一郡之
和無干紀之民無所用權如或水旱相仍疫癘間作民日洵
洵以于鬼神之神譴怒權之用始不窮矣夫天下未有不須權
以治者也神有禍福人有賞罰失於此得於彼神其無以禍
福代賞罰哉鬼道顯人道晦古今有識所憂也中庸曰致中
和天地位焉萬物育焉說者謂吾之心正天地之心亦正吾
之氣順天地之氣亦順鳴呼信斯言之不誣也哉侯治端陽
民畏之愛之蓋有志者也故專
以其大者告之餘皆在所畧
國朝宋志益修城隍廟記自郡縣既設以來縣有令郡有守
矣而必有土穀城隍之神像而祠之凡以為民也守令食

天子之祿使無凍饑其民神享一方之祭使無水旱疾疫以爲民災是助守令福其民者也像而祠之可勿敬乎余以癸巳秋八月來守肇慶始至其民適苦旱穀價湧貴余禱於城隍之神而應乃幸有秋明年春疫大作余禱於神以藥施之疫旋已又明年再苦旱禱而又應是何神之愛我民而靈感若斯也按肇慶城隍祠建自元總管潘文郁增修于明知府王瑩又改修於知府黃琥本朝順治十五年嘗一修之今復六十年矣余感神貺欲修者久顧不欲令民出錢而俸薄又不足以濟茲得罰鍰遂以成之或曰神聰明正直而一者也不聽民樂施而以罰鍰毋乃褻乎余曰神聰明正直而一者也善有賞不善有罰是神之所以示民而守令之職也且民卽以神之故不敢靳其力與財守令何爲舍已集之資而割民衣食之資乎故不疑而新其祠與像焉工始於丙申年八月二日落成於十一月十九日督工者司獄官朱國祚也自注大殿五間後殿五間大門五間儀門五間兩廊廡各五間

龍王廟在七星巖前水月宮之東雍正五年奉旨建乾隆

二十年十月知府吳繩年又在西門法輪寺西偏捐俸另建

一座

吳志

風神廟在府城西門外雍正五年建

阮通志

火神廟在東門外五經里內即五顯廟高要志

名宦祠 鄉賢祠俱見學校吳志

文昌祠 一在城西景星坊宋郡守包拯建後為西察院址

一在石頭岡明萬厯間副使王泮建 一在寶月臺石崇

正五年知縣張明熙建同上

昭忠祠在北門內關帝廟東嘉慶八年奉 勅建安置陣亡

官兵鄉勇牌主致祭阮通志

石峒神祠在七星巖之北七星巖志

宋呂成石峒神祠記石峒神周氏高要人唐貞觀初封貞正公劉漢加王爵宋初避熹廟諱曰秉正神威德之顯郡人建祠於峒中去府城北十里將軍嶺之東七星巖之北其洞則一峯虎踞巖穴天開南北二門上虛通天四傍異石彷彿輿馬徒御拱列呵護異禽鳴嘯出沒空處聲傳恍若神語遇潦水漲溢人跡罕至狂風怒濤則峒有龍歸世傳謂神還宮是歲即五穀熟人厭無食今峒有歇龍池是也皇祐四年儂寇至合城陰禱其寇不終久遁去人民安堵宜奉祀永永不替

蓋有功則祀之周典也乃作迎送之詩曰神之遊兮何所爲
祥風兮甘雨人俟靈兮恍聞神語於千萬年兮幷懷茲土神
之歸兮峒中藹瑞氣兮融融人荷神休兮年穀斯豐竚觀玲
瓏兮如神之封端平二年長至日 按此記已見金石第多
殘缺茲據吳志錄全文內多改竄姑存參

包公祠舊在府治西儀門左宋熙寧中郡守蔣續建元延祐

中知事宋深道重建明宣德六年知府王瑩重修成化元年

知府黃瑜奏入祀典宏治十七年總督潘蕃改建西門內

國朝康熙九年知府史樹駿重修五十五年知府宋志益修

阮通嘉慶六年知府楊有源修道光十一年知府珠爾杭阿

重修

元王揆包孝肅公祠記肇慶郡治東曰龍圖包公祠其來尙
矣公在宋康定初由殿中丞出守於端以清心直道爲治本
地方千里不識賊盜吏無叫囂水蛋山獐熟化奔走恩威並
著歲乃太和歸之日一硯不持獨恨方志不能傳公行事而
海隅之民戶誦人詠至於今稱之君子謂有功於民則祀之
孝肅公之食其土地宜矣嗟夫公之精忠粹德於昭炳耀載

於史冊稱爲神明之政聞者莫不興起後爲邦者當以公爲
師延祐七年知事宋深道照磨盧世華修敬祠下顧瞻棟宇
上雨傍風彫剝不完相與謀曰責其在我於是櫟枿瓦墁之
朽腐漫漶者悉大治之既訖工乃曰登斯堂酌斯泉而祀事
久廢可乎爰定典禮以春秋時祭之無後前人將爲後規明
年春白之府齋祓卽事自郡守而次薦裸揭虔僚屬在位降
登有數俎豆具陳牲酒是儀神人來格耆艾嘆嗟不圖復見
文物之盛也秋祭如初禮端之爲郡也萬山四峙攢秀疊碧
大江橫前環抱逶迤原野䟽曠無癘毒之侵俗尙簡朴近梗
化者亦復間見比年以來號爲易治政平訟理固圉空虛公
無負租民安其業雖有水旱疾疫不爲災眚牧長行寬平之
政幕賓盡佐理之方是皆蒙公之澤囿公之化遂濟登茲荷
歟休哉咸賴有紀以著厥美姑敘其重修歲月被之金石并
以誅文刻之石以貽久誄曰一麾北歸一硯不持越數百載
遺愛在茲後之來者景行
先哲包井之泉清風高潔
明包孝肅公石刻部頒祭文維成化某年甲子二八月某日
肇慶府具官某等致祭於宋包孝肅公之神曰惟公剛明直
介澤遺於端一硯清風廉頑百世惟茲仲春
秋謹以牲帛醴齊粢盛庶品式陳明薦尙饗
明黃瑜請祀包孝肅疏黃瑜建言爲崇祀賢臣事謹按圖誌
載宋孝肅公包拯康定初繇殿中丞出守端州以清心直道
爲治本地方千里不識賊盜水蛋山猺熟化奔走恩威並著
歲乃太和稱爲神明之政官滿歸之日不持一硯其有功於

端民者固多至今非獨端民稱頌普天之下雖婦人孺子無不知包待制之名夫有功於民則祀之故肇慶舊有包公祠在府治內東南隅考之碑石前代有祭今歷年久祠宇雖在祀典不聞如蒙准言乞卽勅該部計議合無每歲於春秋仲月支給官錢買辦牲醴擇日致祭仍乞降與儀注祭文刻石永爲令典則不惟前代賢臣有功於民者得廟祀於無窮將今日與後代之任郡邑者有所感發而興起矣

張詡包孝肅新祠記端之名宦每以宋包孝肅公爲首稱而公之善政每以清正爲之本觀其自賦詩云清心爲治本直道是身謀可知按史公立朝剛毅貴戚宦官爲之歛手平居無私書故人親黨皆絕之至比其笑爲黃河清又相目爲閻羅包老雖古之遺直弗過也雖貴自奉如布衣時遺戒後裔出仕有犯賊者生不得歸本家死不得附祖葬雖古之直清弗過也故其守端也往往以直清著端產土硯前守緣貢悉取數十倍以遺權貴公命製者纔足貢數皆本乎直中來也及官端而歸一硯不持皆本乎清中來也坐是地方千里民樂耕桑水蛋山獠趨庭嚮化端之父老至今傳誦之不衰祭法曰法施于民則祀之若公者非其人耶端舊有祠以祀公在郡署儀門之左宋熙寧中郡守蔣續新建其後修廢不一皇明成化乙酉知郡事黃瑜始疏入祀典歲春秋饗以少牢之禮宏治甲子總督都憲潘公以祠限郡署內凡東西往來瞻謁者弗之便也乃委郡守黃侯于郡署外之西百步許相地而改祠焉僉憲許公實交襄之告成之日黃侯徵詡文以

記詡竊嘗嘆夫今昔生民之不幸也莫甚于官吏之貪亦莫甚於政刑之弗平蓋貪則朘民膏血而凋瘵其本矣政刑勿平則賦歛繁而下疲于供應法網密而民無所措手足矣生意沮而廉耻喪禮讓衰而盜賊起職此之繇也又竊嘗怪夫世之貪夫佞士事苞苴總貨寶脂韋泆恣趨炎附勢以爭憐取寵爲得計縱富敵鄙塢貴窮公卿不旋踵禍敗相繼卒之身名俱喪間有幸而免者亦貽殃于子孫其視公之清風直道浩然天地之間尸祝俎豆名流百世之遠得失相去奚啻霄壤哉然則救其敝當若何是故惟直可以塞邪枉之路惟清可以澄貪虐之源昔舜命伯夷爲秩宗曰直哉惟清夫交神明且不能外是而他求焉則以之而正心治人孰謂其不可哉此我都憲公注意乎是祠之遷也豈但寓懷賢之意而已耶將俾食祿與夫宦遊而道出于茲士者造祠登拜之頃觀廟貌之煥然瞻遺像之如在肅然興其仰止之心勃然篤其思齊之志殆見播清風而秉直道濟濟乎其人也則于世道端有賴焉都憲名蕃字廷芳崇德人僉憲名恒字景輝開化人黃侯名顥字伯望莆田人觀其好尚可以知其政矣祠經始于是年正月六日落成則四月朔日也宏治十八年歲在乙丑

國朝宋志益重修包孝肅公祠堂記肇慶古端州也自昔吏乎茲土有治行善政祀于名宦祠者不一人矣獨包孝肅公祀以專祠雖千百年後婦人小子莫不知包公其祠凜凜有生氣豈非以其清乎哉世之所稱公者往往枚指關節不到

笑比河清不持一硯數事謂公之所以過乎人而人所不能及者余以爲此特其清之迹而非其治本之所在公之言曰清心爲治本直道是身謀夫心乃身之主而治之本也心誠清矣理欲是非劃然如涇渭之辨中有定見而意無偏着隨事物之來或試之以鎮靜或投之以倉猝利不能誘害不能奪權勢不能動奸僞不能欺垂紳正色喜怒不形而人不敢干以私是則清其心之效也且公是言合乎先聖先賢之旨矣書曰夙夜惟寅直哉惟清謂敬以直內而後能潔清其心也傳曰心正而後身修身修而後家齊家齊而後國治謂正己而後可以正人也清心直道公之所以成治者意在乎是予小子幸繼公後而景仰乎公之治者竊在乎是使不求諸本而徒以一二端之矯情飾節聳動世俗之耳目欲以追蹤比肩乎孝肅吾知其必不然矣公之祠自宋熙寧中建于郡治內麗譙樓左明知府黃瑜建言請祭焉其新祠明宏治間知府黃顯改建於郡治數百武修於本朝順治之七年余小子受任之後每春秋祀公請隨丁祭之例今年秋始得諏吉而新公祠凡爲門堂廡若干間皆撤其腐敗重立如舊制以地逼民居故無所增

全祖望謁包孝肅公祠詩云誦公郡齋句要言在清心方寸苟不染百惑何能侵去公七百年甘棠尙成陰端人指七井流澤例以深迢迢望崧臺星斗共降臨此是公廉泉足以泝芳襟豈徒可用汲飲之止悁淫春猿與秋鶴神爽長森森祇應憐後來殊難嗣德音我詩叶神絃雅歌奏瑤琴

珠爾杭阿重修包孝肅公祠記肇城西隅宋孝肅包公祠始由明宏治甲子年總督都憲潘公命前守黃君遷建國朝順治十七年前守楊君康熙五十七年前守蔣君相繼興脩迄今百十有餘年矣余奉

命來守此邦屢承禋祀緬企前徽惟公正色立朝史稱關節不到一笑河清固赫然在人耳目當夫出守端州地方千里盜賊斂息水蛋山搖喁喁向化去之日不攜一硯其流風餘韻至今猶歌詠不衰余不敏雖未敢希踪萬一而高山景仰每於趨踰升降之餘輒低徊不能去顧創垂既久傾圯堪虞金碧塵封柱礎苔蝕殊非所以光俎豆而妥神靈因慨然以重脩爲急務商之文武諸寅僚共籌集事凡有樂助者悉聽簽題以襄盛舉爰諏吉於庚寅十月庀材修葺鳩匠經營甫兩月而余適有綰篆高涼之役迨辛卯仲冬回任知以經費不敷未能迅速告藏因勉捐廉俸再加工作復四閱月而落成今日者丹雘一新規模重煥頭門因舊址狹隘乃更拓地而加闢焉燦然改觀矣倘後之守此土者仰瞻祠宇追溯典型將謀踵事增脩以永垂於勿替是又余之厚望也夫道光十二年孟夏穀旦

按祠內有陳白沙書包孝肅詩刻已殘闕據廬州府

志云書端州郡齋壁茲錄入府署

忠節祠一名八賢祠在城北門外卽舊淨明寺也嘉靖二年

提學魏校毀淫祠知府曾直乃合八賢而祀之唐張柬之李

紳宋劉摯鄒浩胡寅胡銓留正張世傑每歲春秋仲月次丁

致祭有分守參政吉水羅僑記吳志萬厯間知府戴熺修國

朝康熙三十二年知府李彥瑁修嘉慶七年縣人公修高要志

明羅僑忠節八賢祠記肇慶府忠節祠祀唐中書令張文貞

公柬之太尉李文肅公紳宋少師劉忠肅公摯侍郎學士鄒

忠肅公浩致堂胡公寅忠簡胡公銓少師留忠宣公正少傳張

越國公世傑祠在府治北關外乃淨明寺故址今太守曾君

直以秋官郎中守正不阿得告家食用言官荐起守是邦比

至謁文廟暨包孝肅祠畢喟然嘆曰先王之制祭祀也凡法

施於民則祀之以死勤事則祀之以勞定國則祀之以唐宋

諸老之寓端者不已遺乎尋奉檄毀淫祠卽以淨明寺非額

建幽敞可祠乃疏名上請於總制御史蕭山張公閱牘喜曰

此逸事也而若承之都哉巡按御史松滋謝公亦曰俞茲缺

典也而刺史能舉之懋哉無何御史豐城余公繼代聞是舉

嘆曰黜邪崇正顯陟明罰關係匪細惟良二千石乃克斯任

斯可觀政矣其行之無惑於時太守唯毅然曰淫祠幻而

多誣非所以道民也乃撤佛像沉之江命崧臺驛丞張士

寧董其役肅載經營易舊更新前爲門三間中爲堂一鉅間

後爲寢三間掖以東西廊十有二間越二月而祠告成費不

及於民而力省功倍爲地深一百三十五尺濶九十三尺太
守涓是歲嘉靖癸未八月之吉奉八賢主如祠率僚屬諸生
行釋奠禮惟謹邦人拜手稽首咸允若惟茲八賢張文貞公
在武后時抗旨首謀誅二張復中宗尋爲武三思中傷貶新
州長流隴州李文肅公累官翰林學士與李德裕元稹齊名
剛介不回爲李逢吉所謗貶端州司馬劉忠肅鄒忠肅皆以
直氣讜言爲章惇邢恕所擠排胡致堂胡忠簡皆以極論和
議之非爲秦檜所切齒前後安置羈管新州留忠宣公初授
陽江尉比用薦入對稱旨脩謹不可犯累官至少師觀文殿
大學士進封魏國公張越國公世傑以宋亡不屈墮水死葬
陽江潮居里蓋諸公心存忠亮志篤丞弼苟利社稷不復顧
身之禍福苟益國朝不復計後之利害蓋其所當自盡者已
也所不敢必者天也而隱隱有不可朽者存其可負哉或謂羣
公東西南北之人也歷數百年而肇合祀于一堂之上果有
之而居歆也與噫有其誠則有洋洋如其神易之假有廟書之禮望
雅頌之於昭來格語庸之洋洋如其神易之假有廟書之禮望
振起風化者邦侯之責欣慕私淑景行先哲者邦人之志惟
太守賢克茲舉底績闡發幽潛廸邦人以順于道將有無窮
之興起焉乃君子之教也故曰可以觀
政矣予特記之俾邦人知政之大者
國朝杭世駿八賢祠記明嘉靖中端州守曾直建八賢祠于
北門外以祀唐張柬之李紳宋劉摯鄒浩胡寅胡銓留正張
世傑而魏元忠以亢直貶高要尉獨不得與余以春日肅拜
祠下心獨異之作歌簡吳太守劉高要君不見魏元忠布衣

上書論兵事金殿吐氣如長虹鐵冠戔戔肅綱紀豪奴杖殺
都亭中除惡志在清君側白簡豈顧張昌宗羣邪側目謠詠
起卑官謫墮炎荒中洞夷畏威噤不發至今厓厂流清風吁
嗟高要一隅地貶官往往王侯充韋承慶輩不足錄如公豈
合隨沙蟲我來端水恣臨眺步履晚出高城東倨危祠屋壓
道左大樹突兀寒烟空入門肅拜認栗主八賢名姓昭愚蒙
唐景龍逮宋迄命大節歷歷摩蒼穹茫茫宦迹證人代屈指
獨少齊貞公甌公總歸齊去留豈復有深意討覈那不謀羣
衷笙鏞暗啞芹藻闕闕二百載無人攻自來守土責匪細社
稷尸祝宜甄綜漢陽王傳志失載韜張誌不與公乏祀將母
同旅窗作歌寄牧尹會看闕憾能彌縫
豐祠從此標九節亘千百世垂無窮

按世駿以魏元忠亢直貶高要尉獨不得與作詩簡
知府吳繩年高要縣知縣劉為鴻增祀元忠

濂溪祠在府城東門外三里即天妃廟舊址明嘉靖四年知
府曾直改建祀周元公以公嘗提點刑獄於廣乃過化地也

春秋二仲次丁致祭

吳志

四鐵御史祠在七星巖

阮通志

卷七

建置

壇廟

明鄒元標四鐵御史祠記肅皇帝初大禮議起諸臣有不次
致公孤者而諸人亦乘機附麗取大位橫莫能禦時松江馮
公簪筆南床以白簡從事直疏某奸某佞某忠實可托某才
可使交戟中不與公為難者無幾上震怒逮論死廷鞫諸所
論奏者方在事公面責甚具天下聞而壯之母夫人上書請
代不得子行可年方幼刺血書上之肅皇帝憐而譴戍雷陽
戍雷陽者若而年蒙上在宥得歸九峯三泖間與魚樵為侶
無意人間事及肅皇帝晏駕詔諸故言事者生者賜環死者
褒恤公賜環列年方七十僅晉公大理丞致仕天下聞而悲
之曰馮公即八秩猶與載在後車者同科乃公神尚王也
鋼公何說公稽首曰波臣得歸老牖下牧豕海上課子躬耕
皆聖主恩也彼忌者實知我成我敢它望天下復以公為長
者公沒若而年舊雷陽諸士人業祀公十賢祠而端州舊從
公教指者思公不見議剏祠祀公諸當道與郡邑各捐金相
其成顏曰忠孝堂蓋聞公子刺血為公請代也時肅皇帝嘉
嘆曰是父是子忠孝一門蓋取諸綸音所褒崇者茫茫宇宙幾人
忠孝之義炳三光垂萬億臣子無負斯義者茫茫宇宙幾人
過公祠者無論奸佞之夫銷魂即懷忠義者能不泚然有餘
思哉祠在寶月臺東七星巖前祀公父子其中方落成太守
江君偕司理李君請子記元標雖懷孤憤敢式望公萬一或
敬為迎送神二
章歌以祀公

按御史阮通志云姓名無考核之乃馮恩事見流寓